



IL SPORT IN DIRETE PAR FURLAN

Al è clâr che la storie dai sports e passe ancje pai **mieçs di comunicazion** che ju contin. Il gjornalism sportîf si podarès incuadrâ tra chês lenghis “speciâls” preseadis dal public pe capacitât di scambi che a instaurin cu la lenghe comune. La comunicazion sportive, di fat, e je siore sedi di lessic tecnic che di espressions popolârs e afetivis (Devoto, 1939): un aspjet che al contribuìs al coinvolziment de masse dai tifôs, aumentant il riclam esercitât des diviersis disciplinis sportivis. La difusion cressinte di tancj sports (massime chei di squadre) e à rinfuarçât il podê di penetrazion dal lengaç sportîf inte lenghe comune o in altris ambits, e la sô capacitât di imparonâsi des pussibilitâts de lenghe.

Lengaç sportîf e lenghe comune, duncje, si incrosin intun fenomen che si verifiche in dutis lis lenghis e la dimostrazion plui evidente si à tes trasmissions e tes cronichis, massime chês radio, dulà che il public al è “obleât” a concentrâsi sul fevelât, no vint nissun element visif di supuart (o di disturb). A son passâts 90 agns de prime **radiocroniche sportive** e, cundut che la ufierte par television e sul web e je grande, a son tantis lis personis che a continuin a sielzi la **scolte radiofoniche** e a preferî che lis azions sportivis a sedin contadis di une vôs apassionade e che e confuarte. Vôs apassionadis a son ancje chês che a condusin **radiocronichis in lenghe furlane**: vêso mai sintude la descrizion di une azion tecniche par furlan, dilunc di une partide di balon o di une di bale tal zeî?

In timps resints, **Radio Onde Furlane** si è impegnade a fâ trasmissions dedicadis al sport e radiocronichis in direte par furlan, tal ambit dal progjet “**Radio Ative**”, finanziât de **ARLeF, Agenzie Regional pe Lenghe Furlane**, cul fin di svilupâ une radio ancjemò plui ative par chel che al inten la lenghe furlane, il rapuart cul teritori, lis tematichis plui atrativis e la atualitât. Midiant di “Radio Ative” a son stadis proponudis ancje “primis”, in particolâr la prime radiocroniche in lenghe furlane integrâl e in direte di une partide dal Udin (une no competitive cul Middlesbrough) e di une

partide di campionât di balon feminin di serie A dal Tavagnà. Lis diretis no si limitin a contâ partidis di balon, si ben ancje incuintris di bale tal zeî o di bale a svol; cun di plui, la atenzion e je dedicate ancje aes scuadris femininis e no dome a chês masculinis, come che e je usance tal panorame talian. Lavorant su iniziativis di riclam, tant che lis diretis sportivis, l’obietif al è chel di svicinâ ae lenghe furlane un public plui grant e di rindilu plui sensibil al ûs de lenghe: doprà il furlan par frontâ un argoment cussi populâr tant che il sport al permet di esaltâ une lenghe dal dut normâl. Pe realizazion di trasmissions radiofonichis tal ambit sportîf, però, al è necessari svilupâ codiçs espressifs e un lessic specialistic che a àn di jessi sperimentâts dilunc des diretis, par diventâ simpri plui cuotidians: un grant lavôr par rindi plui stabil il leam tra lenghe e sport.

